

GENESIS

Chapter 1

1:1-25 God na tapa ena

Itikari ta God na utu te enda te ena eto enda teho mitiaetija rate God ta Ahihi na enda i ta simba ue mitiaetija. Degi tapa te mume kambujoro be mitiaetija eto God na ke ena, "Usasa e," ainge enu usasa itiketo ena. Itiketo enu usasa javotoho God na kito tunga javotoho eto amita javo iji ikena. Mume te usasa te umbuto eonga ikara ena aravo iji kiti ta amina ena. Eto God na ke ehako ena, "Umo nei enda ta iresuja emo nei oje ita iresuja," ainge enu umo oje ita te umo tu ta degi eonga eonga ta pambuto mitiaetera eto God na degi ita amita javo utu ikena. Javo utu ikenu iji nei irae ena amo iji tapa heriso irae ea. Avo eto God na ke ehako ena, "Umo enda ta degi wahai ta pahuro enda opo aisuja," ainge enu umo degi wahaita pahunu enda opo ena. Eto God na ena, "Isivasi tapa enda ta eto erevu," ainge enu eto isivasi tapa erea. Amo be ga tapa hoeto papajikea eto beto ehako erea. Avo enu iji heriso nei wahai irae ena. Eto God na ena, "Iji te hariga te kuro te tapa usasa evu," ainge enu iho bujenu iji bitito usasa ena. Iji beto irae enu mume sihukenu hariga te kuro te tarama te bitito usasa ea. Utu ta usasa na ainge itiketo enda ta bena eto jua te hariga te iji tapa te amita kakane ainge ikena. Avo enu iji four irae ena eto God na ena, "Umo o tapa umo jo ta puvuvujo," ainge enu o nei te nei te tapa umo jo ta sasarikea. Sasariketo papajiketo meni undi ingerekeo papajikea. Avo eto God na di nei te nei te enu sasariketo buju ingereketo pougaho eto peni wahai ea. Avo enu iji tapa five irae ena eto God na ena, "Ombo o tapa enda ta eto puvuvujo," enu eto o tapa enda ta sasarikena eto God ta hajire ikena eto be puvuto meni undi ingerekenu papajikea. Eto God na isivasi jajavotaho avo di ta o ta indari ikena.

Chapter 2

God na embo te pamone te ena

God na enda umbuto embo ena. Eto amita hoenge na embo ta mende ta hukenu wasiri enu eto amita javo 'Adam' ikena avo eto God na i be nei te nei te umbuto pure ta ureto embo umbuto pure jo ta ikena. Enda javo 'Eden' ta eto umo irerembeto degi kateto God ta pure jo ta pambuna. Eto God na i wahai amita javo wasiri amita pure ta ikena eto amita be amo embo na indito mane amburesuja rate iji matu ainge iresuja. Avo eto God na i nei amita javo kiari pure jo ta ikena. Eto God na Adam ta degi ke ena, "Inena pure erevi simba ejo. I be tapa emo indeso rate i wahai amita javo kiari amita be avo mane indeso. I aramita be indeso inena ari javotoho te ari sapura te tapa amita kiari umbuto amburesoa avo embo avo mane indeso," ainge ena.

Eto o te di te tapa God na enda na ove ena avo umbuto Adam ta degi ikenu Adam na kito di ta o ta javo wahai wahai ikerekena. Eto God na ena, "Adam eonga mitia amo javotoho manera avo embo na pamone aisona eto amina hondate asuja eto amita ae asuja," ainge eto God na Adam ta degi evari amo jenekahunketo ikenu Adam na jenekahunketo evunu God na Adam ta hamo haunketo sakija wahai umbuto ehako arinako eto pamone ove ena. Adam ehako erenu God na pamone umbuto Adam ta ikena eto Adam na kito ke einge ena, "Umo nau popo wahai na sariketea. God na nau sakija wahai umbuto umo ove etija eto umo embo ta jo ta eto puvea avoembo na no javo pamone ere ikitena," ainge ena. Avo embo singapora na ae jimbuora eto mamoto toto ae ga bisi wahai eto iriora. Eto God na meni ingaja ena eto di te o te isivasi te tapa avo embo na simba aja ena. Bo irae enana ta hamo teho mitiaetera rate enana me kiae God na amita hajire javotoho pere ena avo kito tunga javotoho ue osa ena. Avo enu iji tapa six irae ena. Iji seven te God jangu indina avoembo iji aravo amo nombokora.

Chapter 3

Embomeni na ari sapura ea

Eto o koso o amo ke gamu poekari embo be ra amina pamone ta degi ke einge ena, "God na no degi ta i be pure jo ta erevi mane indoa ke eteite?" ainge enu pamone na ke mine ena, "I be amo indesora rate i wahai pure ugorota amo mane indesora avo tame eto amburesora," ainge enu o koso o na, "ungo mane amburosova ungo indito ari sapura te ari javotoho te tapa ainge amita kiari umbasova eto ungo ta kiari amo God ta kiari aingenombo umbasova amo God kiarira," ainge enu pamone na i be aravo kito uje eto umbuto indie ivu ta ikenu umbuto indina avo eto enana eto kogoeto kia enana bo irae kito i gigi umbuto kajuetu kaeto asukea.

Turete iji bovunu God na pure jo ta isa pambunu Adam te ae te God ta asavi ingito ingosa ta ondikeo God na jage ena, "ungo do ere ove?" ainge enu embo na timbuna, "Na no asavi ingito na bo irae kito joru pambuto ondikitena," ainge enu God na ke mine ena, "Umo amuna etei no bo irae etei? Umo i be indahu indete?" ainge enu Adam na God ta degi einge ena, "Inena pamone nau iketea eto amina i be aravo iketei indena," ainge enu pamone na ke ena, "O koso o na ke sokova nau degi ta etei umbuto indena," ainge enu God na o koso o ta degi ke einge ena, "Avoembo umo minti na enda ta jujumbeto matuainge pambasoa avo eto na ke asona eto no meni undi te pamone ta meni undi te aingeto jujune aisoa. Inena embota utu ta kambasoa eto embo na no siro ta tau amburosoa," ainge eto God na ke einge pamone ta ena, "Umo ari erevi etea avoembo inena meni umbasi ue memenga peni wahai kesoa rate memenga irae au no ivu kito tunga humbutu ehako uje asoa eto ivu na iji tapa simba aisuja eto inena no ivu hondate asoa," ainge eto God na Adam ta ke einge ena, "Umo ari erevi etea avoembo na ke ano bive enda ta eto hoasuja eto inena pure ngahia eto i jeto koveto ureto indari umbuto indie mitima sari aisoa. Umo nanena enda na ove uena eto umo

sari eto ehako enda tombuasoa," ainge eto God na o ta hoga umbuto bo kaeto ikenu asukea.

Pamone amo ungotena tapa ta jape ra. Embo Adam na amita javo Eve ikena. Eto Adam te Eve te ari sapura te ari javotoho te tapa ingia eto God na embo na i ta javo wasiri amita be avo indito ari sapura te javotoho te amita kiari te datohota iriora uje ae ena avoembo amina amita pure ta eto kurumbena eto God na titi jigari anera kepata te pipiri te ikenu pambuto i amita javo wasiri avo simba ere uatera. Eto ivu te ae te pure javotoho toto enda nei ta pambuto andage itiketo ea.

Published 1974

Printed by the S.I.L. Printing Department
Ukarumpa, E.H.D., Papua New Guinea

National Library of Australia
Card Number and ISBN 0 86893 023 7